

դերն ու դղեակները, վանքերն ու տաճարները, կուրգաններն ու դոլմէնները, աչքադարեան պարիսպները, այգեստաններն ու ագարակները :

Յայտնի բան է Եւրոպայում կատարածս բանակցութիւնների հետեւանքը 1908 թ. անբաւարար էր, քանի որ կապիտալիստները չէին զիջանում Կովկասում-ցարի իշխանութեան տակ վտանգել իրենց դրամագլուխը, մանաւանդ սրանց միջնորդները աքնում էին առիւծի բաժինը իրենք կուլ տալ եւ ոսկորները թողնել կալւածատէրին : Ժողովրդի օգնութեան չէի ձգտում, այլ կողոպտելու : Իմ փափագս էր մի փոքր դրամազլուխ կազմել եւ ապա շրջել ձորոխի բոլոր գաւառները, լուսանկարել եւ ուսումնասիրութեանս հետեւանքները հրատարակել . բայց այսօր, այլեւս յուսահատ, զգում եմ, որ չպիտի կարողանամ վերստին այցելել այդ վայրերը, վերստուգել, լուսանկարել, յատակագծերն ու հատւածականները պատրաստել, մի ամբողջական գործ տալ, պատկերազարդ . ուստի դրի առայ, ամփոփեցի յիշատակարաններիս մնացորդները եւ յիշողութիւններս յանձնում եմ մամուլին :

1918—1920 տարիների խժդժութիւնների ժամանակ տունս հինգ անգամ խուզարկել եւ հաւաքածոյս ցրւել էին, 600 կտոր զխտական գրքերիս հետ, այնպէս որ նորից եմ հաւաքել եւ ժողովել այս բոլորը :